

樂志堂文集

樂志堂文集卷一

南海 譚 瑩玉生撰

百花生日賦

壽安坊裏花如繡萬花會惜花枝瘦無雨無風花自佳  
年年歲歲花同壽批紅判白壽花詩秋菊春蘭各一時  
豔福能消幾千朶小劫猶然十萬枝宴天孫於璇室候  
阿母於瑤池二月挑菜之節中旬進瓜之候撲蝶會宜  
祈蠶俗舊待羯鼓之喧聞聽金鈴之節奏風淡蕩於佳  
晨日曛曛於永晝四照徘徊扶闌盛開金盆碧醪繡被  
紅堆霞九光而作珮露五色以凝杯整香鬢而欲出垂

翠袖以仍回敝雙環之屏幃下七寶之樓臺括香園角  
顧影堂隈月姊曾來日兄俄至帳迓風姨旃留星使縱  
新蒲細柳之聯豈翠柏蒼松所賜太乙蓮浮湘妃竹醉  
鷗聞三請燕賀雙高歌有雪衣娘子舞爲錦帶功曹鳳  
子信神仙所幻蜜官兼將相之豪螻蟻赤幘螳螂綠袍  
遂有山郭輪蹄郊園士女分隔仙凡交同爾汝入座右  
而能勸向尊前而畧敘千秋萬歲之詞益壽延年之語  
知色相之俱空惜流光之如許是蓋序有涼燠同關盛  
衰合作供養端能主持悟培植之有漸歎開落之無私  
祝長生而不死歷終古兮芳時春日花仍舊春人鬢有

絲爰爲之歌曰佳節雨潺潺春紅點砌殷一年花事盡  
拚永掩柴關又歌曰愛花心事總分明今歲今朝雨不  
成乞與天公長判斷一年雨足一天晴

擬陸士龍歲暮賦

有序

昔陸清河作歲暮賦謂適有姑姊妹之喪故言哀入痛  
僕無是也然而海氛不靖時局難言雪虐風饕星移物  
換琴書仍暇笳鼓疊聞時凜冽其易哀歲崢嶸以將盡  
雖園鑪足樂而羽檄交馳不無危苦之詞實冀澆漓之  
返則故國平居滄江獨臥遭逢迥異而心緒之薄惡者  
同也爰擬作此賦而不襲其體其詞云

歲序已殫冬春欲變竹爆燒多桃符換遍誰工守歲之

吟家設迎年之醺細腰鼓打其曾停婪尾盃斟

見成廷珪除夕

詩而自遣版須鬱偏以仍題厯檢樓羅而懶看畧似帝

京景物記沿荆楚歲時續班蘭臺禮儀之志補范石湖  
樂府之詩讎公讎母畫袴朱衣照虛耗以仍耗賣歎癡  
其益癡覓如願以曷冀祭長恩於所司庭無謝雪以彌  
寒窖匪唐花而可咏細雨偏濃朔風猶勁消夜之果誰  
分

見乾淳  
歲時記

編年之稿自訂千門之燎照樓數日之炊

見江

南通  
志

盈甌柏酒逡巡辛盤飯飮戲鎔一鳳以難成陡憶

五羊之全盛若夫餘慶天垂長春地接銀罍兼翠管駢  
羅罽裳與氍毹重疊隔歲買元夕之燈小節榜更春之  
帖壽玉后則遙想郊禋剖黃羊而慣作腰臘書戶則詞  
翰兼美聒廳而鼓吹相答蘇內翰肯作孤山之遊權文

公亦有龍沙之集卽謂陳修不起江偉廓焉孟東野則

友人贈炭江休映則宿衛割璲方朔足用康成漠然史

監門則吟成五步賈長江仍詩祭一年商陸有火博塞

無錢亦結烏金之社

見清異錄

居然獨立之仙

同上

復有麪成

萱草餤造脂花櫻覓楊梅稽插芝蔴喜子之挑各各紫

姑之賽家家面脂頭膏之榮寵椒棹餽櫟之紛拏卜抱

鏡以潛聽戲藏疆而特譁晚粧簪水仙之萼春燈翦菩

提之紗以至祀牀公迎竈帝

並見楊循吉詩

孟姥孟公之祝偃

子萬童之戲戲物有犀象花朵歲軸有金銀珠翠言言

皆福壽宜春字字總吉祥如意奏管彈絲之樂獻棚饋

糕之細打灰堆其誰學燕爆仗以如沸糝盆燭天歲炬  
然桂清寒之門第旦然復何論於富貴其奈刁斗遍野  
旌旗蔽空和蕃有策橫海無功帆遠張錦礮環燕銅鯨  
鮑偃蹇狐兔蒙茸書生養士吾輩從戎營未春而柳細  
幕匪夏而蓮紅笑將軍之大樹悲蕭瑟之寒風加以嶺  
海瘡痍浙閩消息壁壘可知關山無極戰艦不存征裘  
屢易燐火飛兮星無光髑髏語兮雪霜積殺氣慘兮夕  
照黃哭聲哀兮孤月黑弔戰場以涕零聞畫角而心惻  
歲月如梭柴門薜蘿敢復談劍無由荷戈撫良時兮難  
再覺樂事兮偏多喜太平兮有象知天運兮如何殘年



風雪全局關河對短檠以枯坐拍銅斗兮長歌

閏中元賦

有序

咸豐甲寅閏秋久住愁城再逢笑節羈棲何地平居仍  
荷佛緣稿餓有人望治幾同鬼趣憫而代爲之賦其詞  
云

鬼猶求食秋以爲期况值中元之閏樂游初地之時

華林

寺在西來初地粵人歲中元於此設盂蘭盆會

仙城檀施鬼節桐知紙馬芻船

兮客與瓜犀藕節兮甘滋水陸之名齋各具香花之淨  
供尤宜何連番之閨寂惟兩度之翹思寇氛轉熾佛力  
難支歲在甲寅月建壬申江無鐵鎖地盡黃巾始連營  
於村落旋飛礮於城闐戈鋌遍野烽燧兼旬梟獍鯨鯢

之族沙蟲猿鶴之民痛萍漂兮梗泛知絮果兮蓮因眞  
靈不降老佛應嗔待補莊嚴之設偏逢歲序之均而乃  
累月構兵經時轉戰久稽華野之誅遂似黎邱之變鐵  
額銅頭彪身馬面潰圍當戟踰溝著箭人家之生計蕭  
然地獄之全圖活現日月須臾幽明露電何寺敷筵誰  
家營奠度孤者三十六鐙眞一月三秋而不見於時涼  
飈聿至孤月重圓旗翻似雪竈冷無烟髑髏之臺未築  
人頭之堠屹然誰參寶刹莫禮金仙幡幢不挂鐘磬徒  
懸迷津罔覺恨海難填冤霜晨墮餓焰宵燃又是團圓  
之夕長此奈何之天盆莫供夫孟蘭經誰誦夫目蓮使

當嶺海清怡閭閻和晏三元得氣之中七月抵秋之半  
慶令序之難逢覺炎涼之早換閨經七夕而倍憐會借  
中秋而共贊思集福於家庭期度亡於寺觀花果芳馨  
香燈璀璨珠翠駢羅金銀絢爛比前度以彌奢較昔年  
而若判詎謂人歌萋楚地嘯荏蒲澤多鳴雁屋盡瞻烏  
營開市靜門掩城孤僵尸堆塼戰血模糊或搏膺而言  
得請或被髮而訴無辜宜學吞刀之技如觀揭鉢之圖  
方幸再來乎淨域難霑一勺於齋廚况復四海未安中  
原多故西粵依然南京久住國殤之一去杳冥禪誦則  
再期鞏護蘆蔔未聞旃檀莫炷齋恨可知禮魂誰賦夢

遠戍者兮彌年弔古戰場兮無數更虛願之難週倏流  
光之暗度新鬼故鬼上元下元梧桐舊內薜荔荒村梨  
花古墓蔓草平原年年寒食度度黃昏憑仗慈悲之偈  
評量解脫之恩須佈施之稠疊悟來去之精魂沈冥寂  
滅蘊結煩惱鬼能爲厲佛總無言已矣哉慧日當升妖  
星漸落期麥飯兮艱難笑藕絲兮纏縛藉梵唄之雙鳴  
俟法筵之重作鐘警纔醒輪迴匪託際 景運之承平  
合衆生兮安樂

石門懷古賦 有序

石門在南海縣西北三十里郡國志謂南粵呂嘉拒漢積石江中爲門因名石門前人辨之已詳竊嘗買舟過此按諸圖經固未敢謂其言可據然嘉南粵蓋臣也使能於此積石拒漢或未遽至覆亡乃天欲以全粵隸中國卽起趙佗於九原興兵絕道且無能爲役嘉柰僕何哉石門之破嘉之不幸全粵之幸也暇輒攬筆而爲之賦亦以褫將陽故侯毅魄云其詞曰

莽莽平楚滔滔逝川石立陡絕門開呀然不見當時破粵楊僕樓船城郭返照帆檣暮烟漁笛喧而海潮急僧

磬沈而江月圓當夫帝賜哀憐臣奉貢職五嶺遙通三  
關匪隔迨漢使之不還卽粵兵之宜扼豈鏃矛之未酷  
第封節以奚益天子旣親降璽書鄰國亦交馳羽檄變  
弭蕭牆禍除肘腋中外一家河山半壁險非力士之開  
峻似巨靈之擘異函谷而可封匪成皋而亦塞卽使其  
下湏水而逕來統懸軍以深入無間道之可由有潛師  
而易躡島嶼沙平林巒壁立火艦風船山樓粉堞木蝨  
板搖奇材劍俠四山則草木兵喧萬里則雲雷陣合鼓  
作者易衰鞭長者莫及戰于箕而先軫不歸禦於殽而  
孟明可執白起無坑趙之慘王濬無平吳之捷偏霸中

興宗臣累葉而乃敗同鵲岸偏甚虎牢迎刃輒解前鋒  
始交渡水者以罌仍怯斷流者投鞭不勞雷鳴鼓角日  
耀旌旄軍排犀甲隊肅銀刀被江而下入海焉逃救閼  
與而趙奢膽決度陰平而鄧艾功高風以利而偶泊水  
方生而敢嘲挾太山而壓累卵然燭火以燎秋毫馬首  
是瞻而竟克犬牙相錯而誰邀形格已奪血戰相鏖士  
氣佗城之焰軍聲尋陞之濤遂使鳥竟焚巢蛇爭奔穴  
阿房已焦中山必拔守卽墨而事去燒夷陵而氣奪狂  
自跳梁螳能拒轍神降而虢亡鬼謀而曹滅割無玉斧  
而何憑奠比金甌而亦缺嶺海劫灰君臣喋血九郡席



捲三城瓦裂竊國者百祀而忽諸稱制者五王而竟絕  
吳宮則麋鹿游多越殿則鷓鴣啼徹是蓋謀分成敗業  
有廢興苟憑恃乎一戰當鞏固乎千齡慨中原之板蕩  
外聖主之威靈唯偏隅之清淑合壹統乎隆平衣冠彌  
盛帶礪誰盟羈縻者軍無鬪志震疊者國有先聲又安  
問乎攻守之陳迹與險易之殊形獨惜酷吏主兵偏師  
就道建瓴之勢已成獲粟之功尤著而慘殺可誅淫刑  
敢恕經鬼村則名籍難更毀神廟則瓣香誰炷楊僕廟  
毀於唐  
嶺南節度  
使韋正貫迄今看花登陸賈之城剔薛謁任鷺之墓載  
鶴扁舟撈蝦古渡漁樵莫詡英風山水似含餘怒戰壘

客尋詩山無墮淚碑卻近沈香浦煎茶刺史祠松篁笠  
屐香荇藻鬚眉綠雲與白鷗閑倘識興亡局

鹽田賦

有序

鹽田粵東大利也而年來寢不逮昔議者欲稍爲變通之說不知粵鹽之壞壞於販私販私而商疲商疲而販私而丁愈不可問矣丁不可問卽殷商悉爲所累究何法以懲之僕粵人也謹援故老所流聞畧仿柳宗元晉問之詞以少抒其諷諭之情而成此賦固未敢與郭璞閻伯興諸子競短長爾其詞曰

有錢唐估客問於南海釣師曰青州厥貢特重鹽絺鹽筴立於齊國鹽盆權於漢時或生鹽井或產鹽池擅山海而乃富出木石而轉奇惟粵名田盍辨物宜吾子殆

生長於斯者敢期爲我一一詳言之師應之曰鹽官置  
粵肇漢元封都尉設於吳之某王巡院立於唐之肅宗  
由兩宋以迄我朝職官有表食貨有志幾於月異而  
歲不同而粵中鹽利且與兩淮兩浙長蘆山東而代雄  
矣鹽亭有驛李吉甫元和郡縣志之所徵焉鹽場鹽棚  
王存元豐九域志之所稱焉以至劉恂嶺表錄異所稽  
周去非嶺外代答所評而鹽田之制均未嘗切究而講  
明也俯近滄溟帶山灣浦自廣肇惠潮以洎高廉產鹽  
者六府分廣東海北之場而王伯厚玉海之所書宜亟  
補博茂電茂小江大洲淡水鹹水蠶村調樓海矮矮筒

小靖招收碧甲海甲白石丹甕不能遍數利與穀侔蓋  
前明額設者二十有七所至我朝而舊章率由其爲  
田也有港有隄有溝有竇有池有牆有槽有漏潮汐訊  
消長之期風雨卜陰晴之候沙平布以如砥水周環而  
若螯虞其涸而日厚者三以耐水鹹而取蟹沙鹽相雜  
風日兼美置之漏而未乾淋以水而能已鹽鹵乃流沙  
沈於底始則覆之以蒹葭繼則投之以蓮子鹹潮久退  
燂火不起或更試以雞卵魚苗莫不與飯而俱浮矣其  
熟鹽則煮之竹鑊塗以蜃灰容卅廿斛煎三五回胡入  
爨而不焦本柯亭之笛材元霜旣搗蜚雨何來倏煙霏

而霧結鹽海氣之樓臺其生鹽則最苦雨淋端宜日炙  
棚淨無塵池平有石廓平陸以霞明亘前村而月白俄  
愁霖之兼旬均束手以無策綜一漏而計之冬春日微  
日得一石而多損夏秋日盛日得二石而轉益五畝之  
田歲四十收而鹽幾二百石也於是陸運海運山居水  
居監司無臥收之引獐獐甯淡食之虞價微則民無不  
足得易則丁皆有餘下以供嶺海軍農之要上以佐  
朝廷倉庫所需恒估利者十倍僅通行於一隅粵西原  
賴江右遠求指七閩而擊檣望三楚以通舟楫惟閩省  
黔獨一州膏津雪積委路霜稠交廣則公私同悅惠南

之擾匱何憂蓋鹽田粵之大寶又天地自然之美利而殆非蕃舶所能儔客曰是皆然矣方今

皇帝盛明海隅清晏度支非桑孔之倫寇盜絕孫盧之患且也守支搭配弊已宿懲乾沒并兼奸仍立辨王守仁之議上定例恰符劉堯誨之疏陳舊規誰變吳震方書之雜記今則無其事也屈大均載之新語今又殊其制也而近且國課急而商計虧餘鹽溢而正額滯才慙學士竟有私鹺勢非平章公然濫販李林甫之生計凶狡可知王伯齊之往來姓名莫問豈積久而弊叢令智勇之俱困願借箸以籌之庶悉聞乎讜論師應之曰夫

興利者務除其弊而塞流者貴杜其源今子無乃知漏卮之良足惜而未審易轍之匪易言哉

聖天子皇輿遠馭

帝網宏施重臣膺崔浩之錫大府蒙劉晏之知細微之闌出安可恕而飢寒之坐困殆可危粵商當積重難返之餘久無起色西北兩綱傳誰登乎貨殖而顧以中綱爲極商收私而鉤通者固其職矣商賣私而影射者尤難悉矣遍地皆私而官估復高價反爲其所抑矣且令商煮鹽柴紹炳之論殆未易行也就場稅鹽李雯之說亦未甚精也惟秉廉能以率屬先矯情而警輕望似崇



山之峻心如止水之清其下化之食不必魚尾猩脣服  
不必冰紈霧縠使不必俊僕妖姬居不必瑤臺夏屋將  
見家之貧者可轉而使富而鹽之乏者可糴而使足遠  
報轉輸均思儲蓄斯時竈丁亭戶衣焉食焉不敢欺作  
焉息焉不敢暇朝與程功夕同論價駕帆檣而安往給  
米鈔而誰假而不然者原按籍而可稽豈託詞之能辨  
問澄汰之誰宜冀觀摩而漸轉謂驕橫之已極慎搏擊  
所當先能以古而爲鑑知防患於未然涓滴之水終成  
洪川苟隱憂之方始反不如於石田誠不欲見粵人之  
安處而蚩蚩者輒垂涎於利權

紅梅驛賦 有序

紅梅驛在梅關南六十里江右襟帶嶺南咽喉亂山四  
圍孤城一角古幹環堞飛英拂檐殆踰粵嶠者必經之  
站矣僕頻年下第竟月杜門離筵傾竹葉之杯小院逗  
梅花之信嗟嗟楊誠齋讌偕同舍端許謫仙范蔚宗別  
佳長安儻逢驛使屢爽蘿坑在番之約待作鄧尉之游  
憶故人之各別俱歷秦關裁小賦而遠貽幾同息壤詞  
曰

霏霏小雪簇簇晴霞密遮亭堠豔撲風沙玉界停鞭之  
路香宜貰酒之家雄關嵯峨野館濃花行客相告曰所

謂紅梅驛者非邪爾其橫浦相錯中臺屹然大庾則峯巒詰屈保昌則岡阜綿延緣火逕迄黃田闐闐洞開南北地懸誇佗龔之門戶閱宋明而纒連丞相之荒祠無恙將軍之故宅在焉閨閤博敞士馬精妍乃有樹雜古今萼分寒暖出林畔以仍遮亞道旁而不斷寒月相催征塵待澣兼別恨以模糊並離愁而美滿輕郵迢遞以難窮古戍荒涼而莫伴擁琴劍以爭看颺輪蹄而誰管畫角吹忙冷裝行緩况復紅白相閒天開畫圖一里半里三株兩株臉塗脂而步履肌沁酒以當壚盼斜陽於落木訝遠燒於平蕪四山之寒火不熟一騎之春雲特

腴復何殊於鏤冰刻玉滴粉搓酥各嫣然以一笑忘僕  
僕於征途則有大帥辭朝重臣開府閱險隘於中原盼  
關山於南武擁重裘而有霜撲雙旌而似雨西湖之別  
不妨東閣之觀宜補買栽卅本而不遑開報五分而誰  
主若夫左遷絕域遠徙殊方冬春鈴鐸晨夕車箱犴鳥  
蠻花兮君不見山郵水驛兮夜何長此際有天涯之感  
何人無歲暮之傷行萬里而偶駐折一枝而斷腸若乃  
崔駟不樂王粲依人宰輔之安排恐傲王公之留盼誰  
真伴林逋而未可學張雨以無因實迴殊於桃李奈並  
謫於風塵疲驢此地瘦鶴前身以至貨布遙通珠犀遠

販匪宜稱而何知縱寵榮而莫願羅幃無守護之思銅  
笛鮮飄零之怨任開落之番番適淹畱之頓頓雪虐風  
饕香銷粉褪花總無言殆閱人者不知其幾千萬矣又  
有蘇季上書蘭成射策狀頭之手段交推承旨之文心  
相隔冷撥孤筇豔留雙屐紙帳梨香罽袍絮白感身世  
而低徊閱時光而惋惜殘年則酷易周迴故國則猶然  
咫尺霜薄林丹雪深苔碧更有李廣難封諫議誰觸命  
駕無由攜尊相屬羌祖別而餞離觀園花之如玉則請  
望遠登高爲奏落梅之曲曰驛路經今迢迢驛梅開今  
寂寥看花兮意得折柳兮魂銷直衝雪於金臺豈尋詩

於灞橋又曰嶺外兮故山嶺北兮歧路春信兮將闌征  
軺兮誰住梅子結兮青青行人往兮如故

羊城燈市賦

有序

燈市亦嶺南舊俗天下同之無甚異者說者謂年來夷氛未靖百貨壅闕而燈市之盛獨一例從前良可慨也爰爲賦曰

上春正煖元日剛晴微風似翦麗月如冰記五羊之風俗各還燈與送燈老城新城大市小市

並街名

四牌樓分

雙闕門峙八旗之閑散萃焉五嶺之暄妍如此以迄玉帶河傍繡衣坊裏莫不駕六鼇而海遠扶雙鳳以雲高如金瑣碎似玉堅牢矗雲霞於北郭照煙月於南濠列繡摘錦翦紅刻翠蟲魚鳥獸之全獅象鸞龍之異笑兒

女之深情話英雄之故事拗勺藥以欄低綴葡萄而架  
備簷蔔微香芙蕖淺醉鏤金錯采於沿街炫服靚粧於  
列肆城闐士女保社童兒綠腰鼓鬧藍尾杯宜紛裝玉  
琢紙醉金迷百花連理一樹交枝樣分時世價論昂低  
拌十千於一擲慶三五之良時攜歸瑣第買供叢祠祝  
融元武三界華光元壇金華壯繆文昌競報賽於同社  
分祈禳於各坊淹旬痛飲排日歡場亦見豐年之瑞猥  
言宜子之祥地燠不寒月明長在繡幕羅帷香輪寶蓋  
博大昌明陸離光怪瞢騰帝所之游珍重龍華之會傀  
儡戰棚鞦韆綵索七寶莊嚴十分雕琢透鶴醖以瓏玲



賸蛭膏而灼爍盡態極妍鉤心鬪角告比鄰以舊例笑

燈首其何多

燈首新語  
作燈頭

誰家弦管到處笙歌賞玩興闌

吉祥語熟任各各以相酬餉家家而未足堆盤生菜壓  
檐爆竹百子千孫延禧集福待吳越之金錢展良宵於  
十六積習難移繁華可知胡相承以凋瘵仍未改夫澆  
漓慨自籌海無功征蠻屢誤榷場已分估客誰訴嗟合  
市之非昔訝張燈其如故已矣哉鑼響徹平明充閭吉  
兆徵油燈作紅穗宛聞太息聲

羊城燈市後賦

有序

燈市之繁華寢不逮昔則時局愈可知矣茲幸未然也  
復爲之賦曰

微風富麗明月澄鮮互市僊城之地試燈元夕之天依  
然佳節同慶新年交葉重花折枝連理十色九光嫣紅  
姹紫白犬丹鷄鸞皇獅子掣海長鯨朝天獨鯉華戎爭  
戰之場今古興亡之局將相王侯漁樵耕讀佚女奇緣  
老仙閑福鬚眉刻露面目本來裨官小說舞榭歌臺臨  
蘭亭以縮本創畫院之新裁傾城縱觀入市空回錢神  
誰論燈社同開有廟洞焉閒街如沸三城之裘屨紛來

淡月則壺觴迭醉寶馬香車遺簪墜珥鼙鼓鸞簫綠衫  
紅帔寸草有心蠻花欲避普放光明自在游戲當夫天  
下無爲粵東全盛天氣舒和月華端正覩節物之宜人  
當踏歌而共慶若乃方盟結贊未斬樓蘭仍虞反覆倍  
恐凋殘謂驚魂之甫定卽照影而誰看亦復結習相沿  
豪華未減萬影分光百層吐燄比屋喧闐竟街裝點任  
事者期狄武襄之才撫時者抱陳季慈之感然而太平  
有象冷暖自知苟瘡痍之實甚業燈火之依稀仍足慰  
夫岑寂終未逢夫亂離燈供儘清華偏同富貴家買得  
端宜佛菩提葉作紗



樂志堂文集卷二

南海譚瑩玉生撰

酒帘賦一 有序

前明石文介珩撰酒旗賦備述前明權酒弊政我朝  
無是也對酒而極言時事已覺不倫况酒旗又可以概  
酒耶且其前所覲縷猶有未詳者韓非子宋人有酤酒  
者懸幟甚高洪邁容齋隨筆今都城及郡縣酒務凡鬻  
酒之肆皆揭大帘於外以青白布數幅爲之唐人多詠  
於詩楊慎丹鉛總錄幟謂之帘帘謂之酒旗唐韻云帘  
酒家望子也爰廣其意以爲之賦其詞曰

歌板沈沈行鞍歷歷亭短亭長橋南橋北叱撥郊原鞦韆巷陌貰紅酒而人還認青帘而店闌茶鼓聲催餽簫響寂羈留飲者之魂粧點醉鄉之色梅邊柳外郭裏村中護花無術續竹偏工銛原似戟曲未如弓簾幙俱縞旌旗不紅惱閑情之撩撥祝舊恨之銷融幡幡搖日閃閃當風羹材遴選食譜安排烈同薑桂賤到茅柴入市或偶然相值看山而且住爲佳檐亞則一鳩啼屋窗推而雙燕沿街偏入醉侯之目尤關我輩之懷則有清尅重臣通脫貴介舞工鵲鵲而不停逐比鴛鴦而誰奈易服則有司敢彈停車亦三騶相對望似神仙中人座列

屠酤之輩見輒欣然興何可敗若乃飲論文字會釀壺

觴落紅鋪座綠陰署堂

黃山谷集有  
綠陰堂記

詩句賭高王之擅

笛聲懷嵇阮之亡待車公者文靖見太白者知章吟成

卽景迭貯奚囊別有湖海飄零英雄遲暮司業久貧將

軍乃故無錦纏頭之可費失金叵羅而奚與王子淵則

便了不行馬賓王則主人不顧憐拂帽之相招

見黃山  
谷詩

樂典衣而始去更有磨鏡能來吹簫可乞車聲學雷劍

光如月仇拚買首怨憐刺骨相逢則白犬丹雞獨飲有

銅琶鐵撥刎頸交深埋頭事決觀遠影之昂藏觸雄心

而鬱勃卽至莫通名氏甘作隱淪山中樵者江上漁人

冠欹筍籜以辭醉被易蘆花而諱貧炊烟野渡燈火比  
鄰亦相攜而共盼知獨醒之非真復有鬪草芳郊拗花  
空谷從各如雲人原比玉撲蝶方嬉祈蠶待卜微酣而  
誰暈檳榔小醉而頻簪躑躅斜日危闌香風板屋已點  
屐而仍迴非湔裙而誰覲以至滄桑小閤眷屬皆仙還  
經萬里別總千年岳陽樓當非故物餘杭姥倘有前緣  
風月如舊琴樽宛然鸞鶴相識麾幢駐焉莫不開筵覓  
酒沽酒望帘餌殊芝朮要倍齏鹽豈低昂之各別要結  
括而無嫌惟三百杯偶逢袁紹而二萬錢莫與陶潛論  
挂瓶之製異

見容齋隨筆

思折券而愁添亂日飽啖五侯鯖



敢笑揚雄吃平生麴秀才學參米汁佛又曰當代酒人  
多觥籌獄奈何公榮不可及慎向酒甯過

酒帘賦二 有序

酒具之可畫者惟風帘而已矣僕未嫻畫理夙愜觴情  
追憶歡場都成妙繪爰爲小賦庶幾宋畫院竹鎖橋邊  
賣酒家遺譜云

使當露初星晚之天環炭標燈之地腦滿腸肥金迷紙  
醉倒山簡之接羅舞王郎之如意引濁酒而不辭話小  
帘而誰記唯當東風急處斜日圓時落紅似雨垂柳千  
絲幾家臺榭昔日園池賞到傳柑之節游逢挑菜之期  
捉絮特留相撲拗花誰最相思以至踏殘葉於空廊拾  
墮樵於智井紅樹遶山碧雲漫嶺斷碣訪而雞黍局移

遠鐘敲而茶瓜會請疎風冷雨之辰瘦蝶寒蛩之景懸  
蘿則白版門欹叢菊則茜紗窗靜又或稻花村落菱葉  
陂塘放鴨船歸野店釣鱸人住江鄉霞學繡而轉碧月  
如弓而儘黃蕪絲滌暑菰米吹香犬吠芭籬以外見林

企忠翠霞軒  
稿帘影詞

飛笈簪之旁復有閭巷無人關河欲雪湖

山皆水墨峯巒城郭有金銀宮闕櫂漁舟而訪友前村  
擁駝褐而尋僧古刹蓬響鏗然屐聲幽絕縛因松樹而  
稍偏出壓梅花而欲折到處勾留無因護惜瞥見可知  
相憐已極去去行行尋尋覓覓喜歡伯之招邀逗醉鄉  
之消息目斷街懸魂銷路隔况復關山萬里湖海連年

輪蹄不駐琴劍飄然鶯花如夢壺榼皆仙脫錦袍而有  
願停玉鞭而倍憐亦有公子飄零才人落魄典衣足償  
折券誰諧慙鄭莊之未交憐劇孟之不作當絕境而彌  
佳第壯心之如昨已矣哉風雨感斯文杜牧傷春思詩  
句酒帘多莫問緣何事春花秋月任尊空挈鷺提鵬處  
處同不負韶光拚一醉心情先付酒帘中

素馨燈賦

三城伫豔一水吹香浦霞猶麗街月初黃花田采以成  
簇燈市張而列行鏤冰雕玉解佩垂璫驚四照以難擬  
惜九微之未光種移西域豔播南州大夫紀悉侍女名  
留城西河南莊頭柵頭色清香酷葉碎枝柔剛曉露以  
頻摘恰朝暾而并收七門雪暝萬井霜秋旣綰花梳復  
盤珠掠雜名香而夕供參苦茗以徐嚼別有良工乃矜  
新製引綵縷以旁穿紐銀絲而小繫片玉闌珊真珠瑣  
細結葳蕤以玲瓏垂瓔珞以搖曳錯之木槿之濃間以  
海棠之麗鉤心鬪角接葉駢枝瑱蓮的的芳苾離離珍

如瑤燦倍琉璃萬錦千絲之幻駝頭雁足之奇銀幡  
寶蓋翠羽金支例蟬翼而薄似狀龍鱗而簇宜滿注南  
油間然北燭全分蕤桂之烈自掩燒蘭之酷七采裝銀  
九光浮玉翠烟侵而放遲紅燄逼以開速紛婉變而吐  
葩各蓬鬆而暈粟星彩流丹月華炫綠吹百和於天閭  
陋金荷之已俗則見豪家里第著姓池臺珠履晨謁華  
筵夕開光隨酒至香逐歌來播芳風而颭閃延麗月以  
徘徊惜明珠之十斛拌絳蠟之成堆亦有公子烏衣佳  
人絳樹撒萬點之繁星靄一簾之香霧洲拾翠而霞霏  
洞迷香而玉護甲帳留春瓊簫速暮期照灼乎丹心證

清芬於麝炷况當水榭端陽霞廊七夕迎綵棹以含薰  
照針樓而漾碧灼鳳腦於文舟燦龍膏於粉席珠幡舉  
而鯁壑重來絳節飄而鵲河不隔非吐燄以先香縱凝  
煤而儘白復有會供盂蘭醮釀火星羌列屋以排殿更  
中衢而結櫺倣兒女之陳迹悉鸞龍之幻形旛幢益豔  
瓶鉢皆馨極此花之大觀遞送秋而靡停莫不織雨侔  
紗裁雲學帟芳馥于梅熒明似水楊用脩誇之以至豔  
黎美周賦之而畧備是廣州全盛之時補節物歲華之  
記重爲歌曰百寶綴流蘇如蘭復似雪誰似素馨魂千  
年心尙熱百日紅猶在穠華倏已非不隨燈火盡終學

彩雲飛



紅豆賦

銷魂誰贈入骨相思定及烹葵之語如賡采葛之詩祝  
東風兮太早生南國兮偏遲第女兒之愛此獨年少之  
憐伊以彼葉似黃槐樹維紅豆蛤呖昏黃雁來時候帶  
夕照以成金映落霞而如繡黃菊園亭丹楓斥堠謝豹  
之笥成竹牽牛之花繞籬霍小玉之淚痕的的薛靈芸  
之血漬離離珊瑚瑱碎韎韐芬菲分明同於玳瑁粧點  
倍於臙脂如以漆而投膠豈看朱而成碧含似瓜瓢小  
於蓮葯合浦珠明荆山玉赤定比貓睛嫣然猩色砂擲  
米兮旋成錦迴文兮誰織寄幽恨於無端喚小名而艷

極鸚鵡啄兮愁余蟋蟀鳴兮憐汝荳蔻初胎梧桐新乳  
青棠生兮合歡櫻桃小而欲語榆有莢兮宛然榴多子  
兮誰比鶴頂露渥如之丹魚鱗笑可憐之紫花含蕊而  
彌嬌草拔心而未死帳掩流蘇燈然芳苒芍藥抽芽丁  
香結子爰賦惱公時聞懊儂定情語麗本事詩工綠珠  
身世絳樹儀容鳥營巢而並命蝶作繭以同功扇描鸞  
而璀璨釵綴鳳而玲瓏楊子幼之二頃須種郭景純之  
三升已空同摩勒之盜綃學羅虬之比紅已矣哉斷腸  
原比於海棠奪目早同於罌粟醉有檳榔哀同躑躅捻  
殊妃子之花染豈湘娥之竹蚌無胎而匪精鮫有淚而

盈掬宜歌石帚之詞藉記韋孃之曲嗟嗟紅杏尙書之  
讚誰讀白鶴禪師之偈不聞顧古湫之畫圖仍在董東  
亭之篇什可焚

並見茶  
餘客話

昔似吳園次今同惠密雲

玉蘭花賦

有序

余家舊有玉蘭一株花時輒賞玩其下後以析產別居  
花亦移植他所業同顏氏叢蘭久作庾郎枯樹爰追憶  
而爲之賦云

東風別院明月雕闌池平樹古人靜階閒瓊蕤各各寶  
樹珊珊花原比玉木總稱蘭伴瑤臺於夜永耐釦砌之  
春寒爾其樹似辛夷花如木筆玉蕊根株瓊花標格例  
江梅而稍肥比山礬而較逸落落離離疎疎密密居然  
鍊幹虬枝原是蕙心蘭質散亦留仙拈宜供佛鏤冰翦  
雪滴粉搓酥刻茗華之情思雕楮葉之工夫似芙蓉而

皎潔較蒼筤而敷腴玲瓏剔透飛動扶疎水精簾隔宜  
稱雲母屏遮有無豈留香於燕姑仍作佩於左徒雲階  
月地玉導瓊琚當夫桂宇懸香梨雲選夢寶鼎烟沈銀  
瓶水凍兼木奴以吐芬儷水仙而作供三月芳馨一年  
迎送待月徘徊司風鄭重何知金谷之春獨愛璇閨所  
種亦復貫同薜荔扃等江離被繁霜以摧折經墜露以  
離披豈乏松筠之操嶢然冰雪之姿昔年臺榭何處園  
池珠閣銀櫳之別閨風瑤島之疑憶美人兮撫香樹思  
公子兮折瓊枝幾番開落兩度相思已矣哉金銀宮闕  
淨無塵角扇黃衫別有春夢於羣玉山頭見詎知原是

此花身

孔雀賦

有南夏之珍禽稟麗精而挺質擢修尾以自揚奮洪姿  
而特出何眾鳥之襍褻獨金華之藻逸蓄文采於闕賓  
非鷗皇其誰匹喬木誕瑞深山孕靈飛擇巖幽浴喜沙  
平丹口素規翠角元睛錦輪張而照爛金線綵而晶熒  
視雲霞以迭變隨花萼而俱榮朝棲桃林之末夕啄荔  
支之英時迴翔以盼睠或振迅以飛鳴於是羨光儀之  
倏爍偉靈表之輝煌詔迹人於遐裔頒翼氏於炎荒弋  
無待播畢未暇張彼愛護其殊羽深自蔽於修篁麝剔  
臍而重惜雞斷尾而可傷慮倉皇而一顧致金翠之無

光惟善收於羅網實相賞於文章爾乃離羣棄偶辭母  
別子轉徙彌年飄流萬里置身瑣第之中戢羽雕籠之  
裏飲以凝露之漿飼以霏瓊之藥何隆恩之迴殊嘉文  
藻之尤美鸚鵡慧以非儔蒼鷹驚而莫比敢低止以相  
污良虛縻而獨恥哀時命之旣蹇擅瑰奇於此身旣飄  
零而去國更顛顛以依人縱顏色之永好亦騫騰之靡  
因倘園林之久叅終雁鷺以相鄰角蓬鬆而特起翅軒  
翥而難伸顧形影以淒絕覽光華而備陳於時綺樹晨  
開金堂晝敞袪服爭華纖歌振響卻步躊躇凝情俯仰  
碧聳毳鮮錦舒翼廣累跼重葩羌難髣髴玉止金亭若



還而往旣而素月流天綠苔生閣鏡檻無人湘簾自落  
俄弁形茹依屏魂愕委殘碧以凋零銷暗金而索寞聞  
舊曲以無由抱長思而寡樂佳人有瑤瑟之悲上客有  
錦書之託在池沼而誰禁守階墀而已薄憶當年之瑰  
瑋交羽族之參差何今日之鳴嘯獨相伴以雄雌望桂  
枝之故巢渺雲海於天涯嗟櫺檻之相隔假羽翮而安  
之迎日光而起舞解人語而深思見綵衣而莫妬謹跬  
步以自持愼欽崇於九德庶恩顧其無移

白鵬賦 有序

白鵬張茂先謂以行止閑暇得名余避亂僑居良書獨  
擁適村人有豢此者雖棲遲羈旅而馴擾安處無亦本  
性然歟爰感而爲之賦其辭曰

維南越之奇鳥擅羽族之幽閑體貞靜於自然爰名之  
以白鵬似山雞而異色類雉翟而無斑濺浪花於海裔  
積朔雪於巖間原耿介以難畜諒不愜於人寰爾其素  
質黑章紅頰赤觜柔冠翠鬣修距丹趾尾憐四尺之長  
文愛漣漪之似西漢興而獻人南宋亡而墮死蕭穎士  
則偕八月以同徵唐武宗則列十圖而玩矣當夫晴川

映日春樹籠煙沙隄明淨溪水澄鮮棠梨花裏苦竹叢  
邊拂綠草以朝步依白蘋而晝眠如鵲形狀而秀絕比  
鶴精神而灑然沾香露之離離映斜暉之簇簇傍流水

兮落花對青山兮喬木時照影於江潭或流音於澗谷

笑社燕之太忙信家雞之相伏任鷗鷺之相逢顧魚鰕

而不啄嗟生平之獨處防憂患於未來結網罟以相待

薦杯觴其足哀倘性命之幸存惜毛羽之摧頽苟無飢

渴了不驚猜喜朱門兮安穩占玉堂兮徘徊小瓦缸本

聖俞

致而偶飼翠篴籠

本元微

編而莫開久依戀以奚

爲輒昂藏以相向原悃悃以無華能揣摩乎時尙孔雀

之文章不如鸚鵡之語言宜讓知故巢之何若日懷歸  
以無當誰如李白之求竊慮雍陶之放每當庭餘寒月  
院有閑花砌掃文石窗推碧紗仍潔白以自好終寂寞  
以無譁時弄涼波偶啄平沙豈掩嫵於晴雲甯奪鮮於  
曉霞如久客而未返安他鄉其卽家念主人之恩重借  
一枝以自娛諒無塵尾之逐豈有拄杖之驅買原煩乎  
白璧報合抵以明珠憶陋邦而不必命閑客而非誣况  
匪雜於眾禽祇適還其故吾然而似此高寒儘伊棲託  
究異鴻冥如聞雀躍終故土之可懷匪舊林其誰樂暫  
馴狎其無人卽迴惶以如昨更掩抑以孤鳴慕儔侶其

能獲惟端居之多暇匪躁競以相期縱所如之不偶業  
本性其若斯棲庭廡以竊慰伏堦除而莫知並人境以  
罕接決孤飛於異時

江瑤柱賦 有序

海錯不一類而江瑤柱以美特著儻海濱人也乃僅得其中乾者啖之雖不至如端明蘇氏所譏然實不解其味之所以夔絕品流者乃知古今之才所稱寡二少雙尤貴及時而自著也爰濡翰而賦之其詞曰

誇尤物於海隅羨江瑤之獨步聲久重於前論味自高於食部青鰕擬而非儔離支見而遙妒賦殊質而爭推豈常珍而可具爾其毛詩舊註爾雅曾名喚海月而麗絜呼馬頰而怪呈或上鉅而下狹更首銳而抵平舌竝西施之美名假楊妃之僞小者沙瑤大者江瑤種海田

而欲遍變踰年而豈遙風自南而仁起日再上而偏饒

其柱則圓比搔頭長踰膚寸玉瑩指柔雪融牙嫩奚絲

髮之稍麗已裸額之全褪卽車螯而實殊恐蛤蜊之久

遜搜羅乍得鐫琢何精郡看流碧子冀添丁劑仙姿以

水火澆紺體以椒橙不腥不勒宜燂宜生色如珂而倍

潤味似酒而彌馨雞汁過而信美豬肚假而亦矜

崇幸張循王府節署下酒十五盞第十二盞豬肚假江瑤若夫蠓田蜺埠之村梅子

藕花之節嘉賓旣來華筵特設招子美而入座喚仙君

而就列挂席拾而方羸解衣求而獨切法但工於腹胸

香更便於口舌百枚豈多一沸遂輟信脆美之無倫自

甘鮮而兩絕若乃踰脩阻閱寒暑指動先占情深延伫  
嘗異味而如失盜虛聲而誰許嗟高格之不存選羹材  
而莫與雖沙蛤而猶先幾鯉鯪之爲侶是知遷地弗良  
過時卽異增此日之慙愧記昔時之風味毛勝之簿猶  
存蘇軾之傳原戲夫以媚川之光靈淵之鮮鄉曲誰譽  
良非偶然苟與論夫出處慎毋虛越此海珍之年



